

## Ibrahim Abu Shah kembali ke UiTM



IBRAHIM Abu Shah. FOTO arkib NSTP

**Rafidah Mat Ruzki**

*fidahruzki@bh.com.my*

Putrajaya: Bekas Naib Canselor Universiti Teknologi Mara (UiTM) Profesor Emeritus Tan Sri Dr Ibrahim Abu Shah dilantik sebagai Pengerusi Lembaga Pengarah universiti itu, bermula 18 Januari ini.

Menteri Pengajian Tinggi Datuk Seri Dr Noraini Ahmad dalam satu hantaran melalui Facebook pagi ini menyampaikan ucapan tahniah kepada Ibrahim, 73, atas pelantikan itu.

"Tahniah saya ucapkan kepada Profesor Emeritus Tan Sri Dr Ibrahim Abu Shah atas pelantikan sebagai Pengerusi Lembaga Pengarah Universiti Teknologi Mara (UiTM).

"Saya yakin berbekalkan pengalaman luas dalam dunia pendidikan di negara ini, beliau mampu meneruskan kegemilangan UiTM dalam usaha membantu anak Bumiputera mendapat pendidikan tertinggi dan menghasilkan profesional bersaing di dalam dan luar negara," katanya.

Difahamkan pelantikan itu adalah bagi tempoh tiga tahun bermula 18 Januari 2021 hingga 17 Januari 2024.

Ibrahim menggantikan pengerusi sebelum ini, Datuk Seri Syed Zainal Abidin Syed Mohamed Tahir yang tamat tempoh perkhidmatan pada semalam.

Anak kelahiran Melaka itu memulakan kerjayanya sebagai Pensyarah Kajian Pentadbiran dan Undang-Undang pada 1975 dan Naib Canselor Kedua UiTM bagi tempoh sembilan tahun bermula pada 1 Januari 2001 dan bersara pada 31 Disember 2009.

Pada 14 Oktober 2017, beliau dianugerahkan gelaran Profesor Emeritus pada Istiadat Konvokesyen ke-87, UiTM.

**Artikel ini disiarkan pada : Sabtu, 16 January 2021 @ 12:11 PM**